

Govor visokog predstavnika na komemoraciji povodom 20. godišnjice genocida u Srebrenici



Vrijedi izgovorena riječ.

Danas smo došli u Srebrenicu

Danas smo došli u Srebrenicu da ispoštujemo najstarije pravo poznato čovječanstvu – pravo na dostojanstven ukop.

Danas smo došli u Srebrenicu da se sjetimo svih nevinih ljudi stradalih u ovom ratu, jer kad ih se ne bismo sjećali, to bi bilo kao da su po drugi put ubijeni.

Danas smo došli u Srebrenicu da ubijenima, u svom sjećanju, opet damo glas.

Danas smo došli u Srebrenicu da opet kažemo da se ovdje desilo sistematsko i organizirano ubijanje, srebrenički genocid, i to iz jednog jedinog razloga, zato što su žrtve bili Bošnjaci.

Danas smo došli u Srebrenicu da potvrdimo: nema loših naroda, samo loših pojedinaca.

Također smo došli u Srebrenicu da zahvalimo onima koji su zaustavili rat u Bosni i Hercegovini.

Danas smo došli u Srebrenicu da potvrdimo istinu o onome što

se desilo, jer samo nas istina može osloboditi. Samo nam istina može biti kompas koji nas usmjerava. Samo se na osnovu istine mogu postići poštovanje i pomirenje.

Danas smo došli u Srebrenicu da ojačamo proces ozdravljenja: Srba, Bošnjaka, Hrvata i drugih, ali i međunarodne zajednice, koja također nosi dio odgovornosti, kao što je to nedavno rekao generalni sekretar UN-a.

Danas smo došli u Srebrenicu da podržimo oprost, ali da ne zaboravimo.

Također smo došli u Srebrenicu da tražimo oprost i da molimo za žrtve.

Danas smo došli u Srebrenicu da pružimo ruke i gradimo mostove, a ne zidove.

Danas smo došli u Srebrenicu da kažemo: nikad više i da okrenemo novu stranicu, da započnemo novo stoljeće, kao što su Francuzi i Nijemci uradili nakon Drugog svjetskog rata. Nekada veliki neprijatelji danas su stubovi Evrope.

Danas kažemo ne podjelama. Danas, jače nego ikada, pokazujemo opredijeljenost za reintegriranu Bosnu i Hercegovinu.

Također smo došli u Srebrenicu da kažemo da Bosna i Hercegovina ima evroatlantsku budućnost i da su ova zemlja i njeni ljudi dio evropske arhitekture.

Došli smo u Srebrenicu, svi mi iz evropske porodice i šire; došli smo da kažemo ljudima Bosne i Hercegovine: vi ste dio nas i mi smo dio vas; da kažemo da, poštujući mrtve, poštujemo žive.